


諸經要集

卷一

四百四十六  
帳一

51147



諸經要集序

西明寺沙門

道世玄暉撰

帳

原夫法身一相瞻仰異容正教無偏說聽殊  
旨故師有等雨之況弟子有異聞之說良以  
隨機授與逐器淺深至如十二分教之大綱  
八万法門之廣派龍宮西蓄未盡怒林之知  
象駕東馳豈窮手葉之誨是以不遊大海未  
覩沃日之奇不仰太山靡覲干霄之狀得驪  
龍之珍乃驗魚目之非寶聽黃鍾之節方知  
擊缶之爲細故知釋典幽宗聖凡所尚寔人天  
之秘寶越儒墨之希聲威振大千光超巨億  
益覃沙界功逾塵劫弘濟之術其大矣哉但

時緣未會感通有殊暨晨林變彩宵夢啓徵  
創開白馬之基漸被赤烏之歲聖迹遐感年  
逾六百道俗蒙益等同一子慨正像侵移汭  
流未代凡情闇短器識昏迷日有僥醜教沉  
道喪所以彛章訛替教迹淪胥文句浩汗卒  
難尋覽故於顯慶年中讀一切經隨情逐要  
人堪行者善惡業報錄出一千述篇三十勒  
成兩帙冀道俗依行傳燈有據敬尋釋典深  
奧非淺識而所知出俗幽微豈滯惑而能辨良  
由海大舟輕山高塵眇操刀易割製錦難成  
不揆庸識妄談秘典輒樹題目更增媿慙矣

三寶部

敬塔部

攝念部

入道部

唄讚部

香燈部

受請部

受齋部

破齋部

富貴部

貧賤部

獎導部

報恩部

放生部

興福部

擇交部

思慎部

六度部

業因部

欲蓋部

四生部

受報部

十惡部

詐偽部

惰慢部

酒肉部

占相部

地獄部

送終部

雜要部

諸經要集卷第一

三寶部第一

敬佛篇第一

此別緣

普敬述意緣

念十方佛緣

念釋迦佛緣

念彌陀佛緣

念彌勒佛緣

念佛三昧緣

普敬述意緣第一

夫大聖有平等之相弟子有稱揚之德故十方諸佛同出於淤泥之濁三身正覺俱坐於蓮臺之上隨念何相皆得利益所謂始從出家終成正覺於其中間道樹降魔鹿野說法相好圓滿光明炳著身色清淨事等鎔金面貌端嚴猶如滿月齒同珂雪髮似光螺目譬青蓮眉方翠柳八音響亮万相雍容五眼洞明六通遙颺懸河寫辯連注投機圓三點以成身具五分而爲體帶權實以度物隨真應

以化人或扇廣大之慈風灑滂施之法雨能使身田被潤即吐無上之芽心樹既榮便茂不凋之葉不來相而來不見相而見爲衆生故隨緣應現十方十億並願歷侍三千大千俱得親承長種福田廣興供養吐邪倒之根拔貪嗔之本修念佛之因感見佛之果矣

如寶性論云三寶有六義故須敬也一者希有義如世寶物貧窮之人所不能得三寶如是薄福衆生百千万世不能值遇故名爲寶二者離垢義如世真實體無瑕穢三寶如是隨離諸漏故名爲寶三者勢力義如世珍寶除貧去毒有大勢力三寶如是具不思議六

神通力故說爲寶四者莊嚴義如世珍寶能  
嚴身首令身姝好三寶如是能嚴行人清淨  
身故故說爲寶五者最勝義如世珍寶譬諸  
物中勝三寶如是一切世中最爲殊勝故名  
爲寶六者不改義如世真金燒打磨鍊不能  
變改三寶如是不爲世間八法所改故名爲  
寶又具六意故須敬也一佛能誨示法是良  
藥僧能傳通皆利益於我報恩故敬二末代  
惡時傳法不易請威加護故須致敬三爲物  
生信稟承故敬四示僧尼敬事儀式故敬五  
令樂供養法得久住故敬六爲表勝相故敬  
成論云三寶最吉祥故我經初置



念十方佛緣第二

如觀佛三昧經云昔過去久遠無量世時有佛出世号寶威德上王時有比丘與九弟子往詣佛塔禮拜佛像見一寶像嚴顯可觀禮已諦視說偈讚歎後時命終悉生東方寶威德上王佛國大蓮華中結跏趺坐忽然化生從此已後恒得值佛於諸佛所淨修梵行得念佛三昧海得三昧已佛爲授記於十方面各得成佛東方善德佛者則彼師是其九弟子者作九方佛謂東南方無優德佛南方栴檀德佛西南方寶施佛西方無量明佛西北方花德佛北方相德佛東北方三乘行佛上方

廣衆德佛下方明德佛如是十方佛由因過  
去禮塔觀像一偈讚歎今於十方各得成佛  
又觀佛三昧經云昔過去久遠有佛出世号  
曰空王入涅槃後有四比丘共爲同學習佛  
正法煩惱覆心不能堅持佛法寶藏多不善  
業當墮惡道空中有聲語比丘言空王如來

雖復涅槃汝之所犯謂無救者汝等今可入  
塔觀像與佛在世時等無有異聞空聲已入  
塔觀像眉間毫相即作念言如來在世光明  
色身與此何異佛大人相願除我罪作是語  
已如太山崩五體投地懺悔諸罪由入佛塔  
觀像毫相懺悔因緣後八十億阿僧祇劫不

墮惡道生生常見十方諸佛於諸佛所受持甚深念佛三昧得三昧已爲十方佛現前授記今悉成佛東方有國名曰妙喜佛号阿闍即第一比丘是南方有國名曰歡喜佛号寶相即第二比丘是西方有國名曰極樂佛号無量壽即第三比丘是北方有國名蓮華莊嚴佛号微妙聲即第四比丘是以是因緣行者應當如是願觀佛也

又迦葉經云昔過去久遠阿僧祇劫有佛出世号曰光明入涅槃後有一菩薩名大精進年始十六婆羅門種端正無比有一比丘於白氎上畫佛形像持與精進精進見像心大

歡喜作如是言如來形像妙好乃尔況復佛  
身願我未來亦得成就如是妙身言已思念  
我若在家此身叵得即啓父母求哀出家父  
母荅言我今年老唯汝一子汝若出家我等  
當死子曰父母若不聽我者我從今日不飲  
不食不昇牀坐亦不言說作是誓已一日不  
食乃至六日父母知識八万四千諸采女等  
同時悲泣禮大精進尋聽出家旣得出家持  
像入山取草爲座在畫像前結跏趺坐一心  
諦觀此畫像不異如來如來像者非覺非知  
一切諸法亦復如是無相離相體性空寂作  
是觀已經於日夜成就五通具足無量得無

礙辯得普光三昧具大光明以淨天眼見於  
東方阿僧祇佛以淨天耳聞佛所說悉能聽  
受滿足七月以智爲食一切諸天散花供養  
從山而出來至村落爲人說法二萬衆生發  
菩提心無量阿僧祇人住於聲聞緣覺功德  
父母親眷皆住不退無上菩提佛告迦葉昔  
大精進今我身是由此觀像今得成佛若有  
人能學如此觀未來必當成無上道  
又觀佛三昧經云昔過去久遠有佛出世号  
釋迦牟尼滅度之後有一王子名曰金幢憍  
慢邪見不信佛法  
有一比丘名定自在語王子言世有佛像衆

寶嚴飾極爲可愛可暫入塔觀佛形像王子即  
隨共入塔中見像相好白比丘言佛像端嚴  
猶尚如此況佛真身比丘告言汝今見像不  
能禮者應當合掌稱南無佛是時王子即便  
合掌稱南無佛還宮繫念塔中像故即於後  
夜夢見佛像夢已歡喜捨離邪見皈依三寶  
由一入塔稱佛善根命終得值九百千萬億那  
由他佛於諸佛所逮得甚深念佛三昧得三  
昧故諸佛現前爲其授記從是已來經於百  
萬阿僧祇劫不墮惡道乃至今日獲得甚深  
首楞嚴定昔王子者今財首菩薩是以是因  
緣智者應當如是學念佛也

又法華經偈云

若人散亂心 入於塔廟中 一稱南無佛 皆已成佛道

又譬喻經云昔有國王殺父自立有阿羅漢知此國王不久命終計其餘命不過七日若命終後必墮阿鼻地獄一劫受苦此阿羅漢

尋往化之勸教至心稱南無佛七日莫絕啼去重告慎莫忘此王便叉手一心稱說晝夜不廢至七日頭便即命終魂神趣向阿鼻地獄乘前念佛至地獄門知是地獄即便大聲稱南無佛獄中罪人聞稱佛聲皆共一時稱南無佛地獄猛火即時化滅一切罪人皆得

解脫出生人中後阿羅漢重爲說法得須陀洹以是因緣稱佛名号所獲功德無量無邊不可爲喻

念釋迦佛緣第三

又觀佛三昧經云昔佛在世時佛爲父王及諸大衆說觀佛三昧經佛有三十二相八十四種好身真金色光明無量時座下有五百釋子以罪障故見佛色身猶如灰人羸婆羅門見已號哭自拔頭髮舉身投地鼻中血出佛安慰曰汝勿號哭吾爲汝說過去有佛名毗婆尸入涅槃後於像法中有一長者名曰月德有五百子聰明多智無不貫練其父長者



信敬三寶常爲諸子說佛法義諸子邪見都  
無信心後時諸子同遇重病父到見前泣淚  
合掌語諸子言汝等邪見不信佛法今無常  
刀切割汝身爲何所怙有佛世尊名毗婆尸  
汝可稱名諸子聞已敬父言故稱南無佛復  
教稱法及稱僧名稱已命終由稱佛故生四  
天王天天上壽盡以前邪見還墮地獄獄卒  
羅刹以熱鐵叉刺壞其眼受是苦時憶父教  
稱念佛因緣從地獄出來生人中貧窮下賤  
後式佛出亦得值遇但聞佛名不覩佛形後  
隨葉佛拘樓秦佛拘那含佛迦葉佛亦皆聞  
名不見其形以聞如是六佛名故今得與我

同生釋種我身端嚴如閻浮金汝見灰色羸  
婆羅門皆由前世邪見故尔汝今可稱過去  
佛名并稱汝父亦稱我名及弥勒佛稱已作  
禮及向大衆大德衆僧五體投地發露懺悔  
邪見之罪諸人受教懺悔訖已見佛金色如  
須弥山見已白佛我今見佛三十二相八十  
種好無量光明作是語已得須陀洹求佛出  
家得阿羅漢三明六通具八解脫佛告比丘  
我滅度後若稱我名南無諸佛所獲福德無  
量無邊

又大悲經云佛告阿難汝觀如來在路行時  
能令大地高處令下下處令高高下諸處悉

得平正如來過後地輒還復一切樹林傾側  
向佛樹神現身低頭禮拜如來過後樹輒還  
復一切丘陵坑坎屏廁臭穢叢林瓦礫皆悉  
掃除平正清淨馨香芬烈衆華布地如來足  
履踏上而過無情諸物尚皆傾側何況有情  
而不加敬何以故我本修行菩薩行時於一  
切人所無不傾側謙下禮敬以是善業得成  
佛已有情無情如來行時無不傾側低頭禮  
拜我本曾以清淨微妙稱意資產至心自手  
施諸衆生以是業報如來行時大地平正掃  
灑清淨又無瓦礫我於無量諸賢聖所在路  
行時曾與掃治道路泥治房舍我以平等心

無高下掃治令淨於一切時常求菩提利益  
衆生以是善根若佛如來在在處處行來路  
首自然清淨地平如掌乃至須弥山王高八  
万四千由旬在大海中亦深尔許及鐵圍山  
高十六万八千由旬亦是金剛堅固佛涅槃  
時無不傾側低頭禮敬若欲遠避不傾側者  
亦無是處

又普曜經云由如來過去心淨離著不害衆  
生故所行之處脚足不汚虫蟻不損

又處處經云如來行時不著履有三因緣一  
使行者少欲二現足下輪相三令人見之歡  
喜佛行足去地四寸有三因緣一見地有虫

蟻故二地有生草故三現神足故亦欲令人  
意正佛行地高下皆平有三因緣一本行四  
等心欲令一切安隱地在水上水中有神垂  
蛾一切值佛足下皆得安隱同心立意是故  
卑者為高高者為卑二諸天神行福為佛  
除地故高下為平三佛為菩薩時通利道徑  
橋梁度人故從是得福故高下平正欲令人  
意亦尔

又智度論云世尊身好細薄皮相塵土不著  
身如蓮華葉不受塵水若菩薩在乾土山中  
經行土不著足隨嵐風來吹破土山令散為  
塵乃至一塵不著佛身若菩薩舉食著口中

是時咽喉邊兩處流注甘露和合諸味是味  
清淨故名味中得上味

又增一阿含經云無恭敬心於佛者當生龍  
虵中以過去從中來今猶無敬多睡癡也

又四分律說偈云

有敬長老者 是人能護法

現世得名譽

將來生善道

念彌陀佛緣第四

問曰何名淨土答曰世界皎潔目之為淨即  
淨所居名之為土

故攝論云所居之土無於五濁如頗黎柯等  
名清淨土

法華論云無煩惱衆生在處名爲淨土淨土  
不同有其四種一法性土以真如爲體故梁  
攝論云以蓮華王爲淨土所依譬法界真如  
爲淨土所依體故二實報土

依攝論云以二空爲門三慧爲出入路奢摩  
他毗鉢舍那爲乘以根本無分別智爲用此  
皆約報功德辨其出體三事淨土謂上妙七  
寶是五塵色性聲香味觸爲其土相故攝論  
云佛周遍光明七寶處也

又華嚴經云諸佛境界相中種種間錯莊嚴  
故淨土論云備諸珍寶性具足妙莊嚴  
又雜翻大菩薩藏經云假使如上世界乃至

大火洞然如來在中若依經行若住坐卧其  
處自然八功德水出現於地四化淨土謂佛  
所變七寶五塵為化土體故涅槃經云以佛  
神力地皆柔軟無有丘墟土沙礫石乃至猶  
如西方無量壽佛極樂世界等

又大莊嚴論云由智自在隨彼所欲能現水  
精瑠璃等清淨世界

又維摩經云佛以足指案地現淨等事

又十地經云隨諸衆生心所樂見為示現故  
此諸經論所明並約化為淨土由佛神力現  
故有攝故即無故名化土

述曰上來雖明土有四種然綱要有二一報



土二化土此二即攝理事二土初報土者謂  
佛如來出世諸善體是無漏非三界所攝故  
淨土論云觀彼世界相勝過三界道

又智度論云有妙淨土出過三界然佛所居  
無處爲處過在十方世界或依法身而安淨  
土故論云釋迦牟尼佛更有清淨世界如阿

彌陀國其彌陀佛亦有嚴淨不嚴淨世界如  
釋迦佛

又涅槃經云我實不出閻浮提界  
又法華經偈云

常在靈鷲山 及餘諸住處 衆生見劫盡  
大火所燒時 我此土安隱 天人常充滿

園林諸堂閣

種種寶莊嚴

又華嚴經云如來淨土或在如來寶冠或在  
耳璫或在瓔珞或在衣紋或在毛孔如是毛  
孔既容世界故知十住論云佛舉一步則過  
恒河沙等三千世界其事如是化土處者但  
所居化土無別方處但依報土而起麤相或  
通十方或在當界引接三乘人天等衆如彌  
陀卍尊引此忍界凡小衆生而安淨國或於  
穢現淨如按地現淨譬同天宮其事如是或  
於衆生共相器世界間種子所感於中顯現  
淨穢境界隨其六道各見不同此皆由外名  
言熏習因識種成就感得器世界影像相現

此影像是本識相分由共相種子與影像相  
彼現相識爲因緣即此共相由內報增上緣  
力感得如此苦樂不同

又華嚴經云今時心王菩薩摩訶薩告諸菩  
薩言佛子此娑婆世界釋迦牟尼佛刹一劫  
於安樂世界阿彌陀佛刹爲一日一夜安樂  
世界一劫於聖服幢世界金剛佛刹爲一日  
一夜聖服幢世界一劫於不退轉音聲輪世  
界善樂光明清淨開敷佛刹爲一日一夜不  
退轉音聲輪世界一劫於離垢世界法幢佛  
刹爲一日一夜離垢世界一劫於善燈世界  
師子佛刹爲一日一夜善燈世界一劫於善

光明世界盧舍那藏佛刹爲一日一夜善光  
明世界一劫於超出世界法光明清淨開敷  
蓮華佛刹爲一日一夜超出世界一劫於莊  
嚴慧世界一切光明佛刹爲一日一夜莊嚴  
慧世界一劫於鏡光明世界覺月佛刹爲一  
日一夜佛子如是次第乃至百萬阿僧祇世  
界最後世界一劫於勝蓮華世界賢首佛刹  
爲一日一夜普賢菩薩等諸大菩薩充滿其  
中

又優波提舍論偈云

觀彼世界相

勝過三界道

究竟如虛空

廣大無邊際

正道大慈悲

出世善根生

淨光明滿足 如鏡日月輪

述曰如凡夫二乘於穢土中見阿彌陀佛諸菩薩等於淨土中見阿彌陀佛據此二說報土則一向純淨應土則有染有淨故淨土論云土有五種一純淨土唯在佛果二淨穢土謂淨多穢少即八地已上三淨穢平等土謂從初地乃至七地四穢淨土謂穢多淨少即地前性地五雜穢土謂未入性地第五人見後一不見前四第四人見後二不見前三第三人見後三不見前二第二人見後四不見前一第一佛上下五土悉知悉見也

又阿彌陀鼓音聲王陀羅尼經云尔時世尊

告諸比丘西方安樂世界今現有佛号阿弥  
陀若有四衆能正受持彼佛名号以此功德  
臨欲終時阿弥陀佛即與大衆往此人所令  
其得見見已尋生慶悅倍增功德以是因緣  
所生之處永離胞胎穢欲之形純處鮮妙寶  
蓮華中自然化生具六神通光明赫奕阿弥  
陀佛與聲聞俱如來應供正遍知其國号曰  
清泰聖王所住其城縱廣十千由旬於中充  
滿刹利之種阿弥陀佛父名月上轉輪聖王  
其母名曰殊勝妙顏子名月明奉事弟子名  
無垢稱智慧弟子名曰攬光神足精勤弟子  
名曰大化尔時魔王名曰無勝有提婆達多

名曰寂靜

又無量壽經云佛告彌勒假使三千大千世界猛火爲念阿彌陀佛名故要當於中直過未足爲難

又阿彌陀佛經云佛告諸比丘僧是阿闍世王太子及五百長者子却後無數劫皆當作佛如阿彌陀佛佛言是阿闍世王太子及五百長者子任菩薩道已來無央數劫皆各供養四百億佛已今復來供養我阿闍世王太子及五百長者子等皆前世迦葉佛時爲我作弟子今皆復會是等共相值也

念彌勒佛緣第五

如弥勒菩薩所問本願經云阿難白佛言弥勒得法忍久遠乃尔何以不速逮無上正真之道成最正覺耶佛語阿難菩薩以四事法不取正覺何等為四一淨國土二護國土三淨一切四護一切是為四事弥勒本求佛時以是四事故不取佛語阿難我本求佛時亦有此四然弥勒發意先我之前三十二劫我於其後乃發道意於此賢劫以大精進超越九劫得於無上正真之道致最正覺佛告阿難我以十事致最正覺何等為十一所有一切無可愛惜二妻妾三兒子四頭目五手足六國土七珍寶財物八髓腦九血肉十不惜



身命我以十事疾得佛道

問曰凡夫道俗身居欲界行何善業得生同  
界兜率天報

答曰如未曾有經云下品十善謂一念頃中  
品十善謂一食頃上品十善謂從旦至午於  
此時中心念十善止於十惡亦得往生故野  
干心念十善七日不食生兜率天

又上生經云我滅度後四衆八部欲生第四  
天當於一日至第七日繫念彼天持佛禁戒  
思念十善行十善道以此功德迴向願生弥

勒佛前隨念往生

言七日者亦從近說尚感  
彼天何況一生而不剋獲

又上生經云若有禮敬弥勒佛者除四億劫

生死之罪乃至來世龍華樹下亦得見佛

又云我滅度後四衆八部聞名禮拜命終往生兜率天中若有男女犯諸禁戒造衆惡業聞是菩薩大悲名字五體投地誠心懺悔一切惡業速得清淨若有歸依弥勒菩薩當知是人得不退轉弥勒成佛見佛光明即得受記又上生經云佛滅度後若有精勤修諸功德威儀不缺掃塔塗地華香供養行諸三昧讀誦經典如是人等雖不斷結如得六通應當繫念念佛形像稱弥勒名若一念頃受八戒齋修諸淨業命終之時即得往生兜率天上蓮華臺中應時見佛白毫相光超越九十億

劫生死之罪隨其宿緣爲說妙法令得不退  
又增一經云衆生三業造惡臨終憶念如來  
功德者必離惡道趣得生天上正使極惡之  
人以念佛故亦得生天  
又大集經云若修慈者當捨身命時見十方  
佛手摩其頂蒙手觸故心安快樂尋得往生

### 清淨佛土

又普賢觀經云若有晝夜六時禮十方佛誦  
大乘經思第一義甚深空法於一彈指頃除  
百万億那由他恒河沙劫生死之罪行此法  
者真是佛子從諸佛生十方諸佛及諸菩薩  
爲其和尚是名具足菩薩戒者不須羯磨自

然成就應受一切人天供養

又法華經云若有人受持讀誦正憶念解其  
義趣是人命終爲千佛授手今不恐怖不墮  
惡道即往兜率天上彌勒菩薩所彌勒菩薩  
有三十二相大菩薩衆所共圍遶有百千萬  
億天女眷屬而於中生有如是等功德利益  
是故智者應當一心自書若使人書受持讀  
誦正憶念如說修行

又智度論云若善男子能行是深般若波羅  
蜜者當知是人人道中來或兜率天來所以  
者何三惡道中罪苦多故不得行深般若欲  
界諸天著淨妙五欲是心則狂惑故不能行

色界天等深著禪定味故不能行無色界天  
無形故故不能行以毘率天上常有一生補  
處菩薩彼中諸天常聞說般若五欲雖多法  
力勝故是故說二處勝若從他佛國來生此  
間斯則轉勝也

又處胎經佛告彌勒偈云

汝所三會人

是吾先所化

九十六億人

受吾五戒者

次是三歸人

九十二億者

一稱南無佛

皆得成佛道

又處處經云佛言彌勒不來下有四因緣一  
有時福應彼間二是此間人麁無能受經者  
三功德未滿四世間有能說經者故彌勒不

下若當來下餘有五十億七千六十万歲彌  
勒時人眼皆見四千里由本十種因緣得一  
不掩人眼明二不損人眼三不覆人眼四不  
截人善五不視殺六不視盜七不視姪八不  
視陰私及人短九諸惡事不視十然燈於佛寺  
又佛說彌勒來時經云佛言彌勒佛未出時  
閻浮利內地山樹草木皆焦盡於今閻浮利  
地周帀六十万里彌勒出時閻浮利地東西  
長四十万里南北廣三十二万里地生五果  
四海之內無山陵溪谷地平如砥樹木長大  
人少三毒民多聚落城名紀羅那夷有一婆  
羅門名須凡當爲彌勒作父母名摩訶越題

彌勒當為作子相好具足身長十六丈生墮

成地目徹視万里内頭中日光照四千里弥

勒得道為佛時於龍華樹下坐樹高三十里

廣亦四十里大成佛經花枝如龍頭故名龍華樹亦有別傳云子從龍宮出

故名龍華樹也

用四月八日明星出時得道彌勒佛却後六

十億殘六十万歲始當來下生自外大同成佛經說

王玄策西國行傳云大唐顯慶二年勅使

王玄策等往西國送佛袈裟至泥婆羅國西

南至頗羅度來村東坎下有一水火池若將

家火照之其水上即有火焰於水中出欲滅

以水沃之其焰轉熾漢使等曾於中架一金

煮飯熟使問彼國王國王荅使人云曾經以杖刺著一金匱令人挽出一挽一深相傳云此是彌勒佛當來成道天冠令火龍防守之此池火乃是龍火也

又智度論云彌勒菩薩爲白衣時師名婆跋梨有三種相一眉間白毫相二舌覆面相三

陰藏相如是等非是菩薩時亦皆有此相也又新婆沙論云曾聞尊者大迦葉波入王舍城最後乞食食已未久登雞足山山有三峯如仰雞足尊者入中結跏趺坐作誠言曰願我此身并納鉢杖久住不壞乃至經於五十七俱胝六十百千歲慈氏如來應正等覺出



現世時施作佛事發此願已尋般涅槃時彼  
三峯便合成一掩蔽尊者儼然而住及慈氏  
佛出現世時將無量人天至此山上告諸衆  
曰汝等見是釋迦牟尼佛杜多功德弟子衆  
中第一大弟子迦葉波不舉衆咸曰我等欲  
見慈氏如來即以右手撫雞足山頂應時峯  
坼還爲三分時迦葉波將納鉢杖從中而出  
上昇虛空無量天人覩斯神變歎未曾有其  
心調柔慈氏世尊如應說法皆得見諦若無  
留化如此之事云何有耶有說有留化事問  
若尔世尊何故不留化身至涅槃後任持說  
法答所應作者已究竟故謂佛所應度皆已

度訖所未度者聖弟子度之有說無留化事  
問若尔迦葉波事云何得有荅諸信敬天神  
所任持故有說迦葉波尔時未般涅槃慈氏  
佛時方取滅度此不應理寧可說無不說彼  
默多時虛任如是說者有留化事是故大迦  
葉波已入涅槃

惟凡夫力弱習惡來多以任娑婆其心怯弱  
初學是法恐懼退敗常發大願扶持此行乃  
至命終心無障惱隨種善根願共含識自在  
往生弥勒内衆得至佛前隨念修學證不退  
轉不願往主於外衆中恐著五欲不得解脫故  
智度論云有人修少福業自有福處當願往

生乃至命終各生其中

又大莊嚴論云佛國事大獨行功德不能成就要須願力如牛雖力挽車要須御者能有所至淨佛國土由願引成以願力故福德增長不失不壞常見佛故

又如十住論云若人發心求佛不休不息有人以指舉大千世界在空却住不足爲難若發願言我當作佛是之希有何以故世人心劣無大志故

又發菩提心論有十大願常悉修行一者願我先世及以今身所種善根施與一切衆生迴向佛道令我此願念念增長世世所生終

不忘失常爲陀羅尼之所守護二者願我以  
此善根生處值佛常得供養不生無佛國中  
三者願我親近諸佛隨侍左右如影隨形四  
者願我旣得親近爲我說法成就五通五者  
願我通達世諦假名流布解第一義得正法  
智六者願我以無厭心爲衆生說示教利喜  
皆令開解七者願我以佛神力遍至十方一  
切世界供養諸佛聽受正法廣攝衆生八者  
願我隨順清淨法輪一切衆生聽我法者聞  
我名者即得捨離一切煩惱九者願我隨逐  
衆生將護與樂捨身命財荷負正法除無利  
益十者願我雖行正法心無所行亦無不行

為化衆生不捨正願願我以此十大誓願遍  
衆生界攝受一切恒沙諸願若衆生界有盡  
我願乃盡然衆生界不可盡故我此大願亦  
不可盡廣度衆生無邊法界所修善根皆悉  
迴向無上正覺生彌勒佛前聞清淨法悟無  
生忍但行任坐卧一生已來所修善根並共

法界衆生迴向彌勒佛前速成不退自外修

見佛方法彌勒等業具在禪門十  
卷廣說此中直出經文今示往生

玄奘法師云

西方道俗並作彌勒業為同欲界其行易成  
大小乘師皆許此法彌陀淨土恐凡鄙穢修  
行難成如舊經論十地已上菩薩隨分見報

佛淨土依新論意三地菩薩始可得見報佛  
淨土豈容下品凡夫即得往生此是別時之  
意未可爲定所以西方大乘許小乘不許故  
法師一生已來常作彌勒業臨命終時發願  
上生見彌勒佛請大衆同時說偈云

南無彌勒如來

應正等覺

願與合識

速奉慈顏

南無彌勒如來

所居內衆

願捨命已

必生其中

念佛三昧緣第六

惟凡夫倒想隨情妄執六賊交侵五道旋轉  
業繩相係苦報難出所以大聖慈愍垂機引

接故舉淨土之妙國勸觀如來之勝相令翹  
注不懈欣心敬慕俯仰合觀隨心廣略庶令  
悟之善惡則隨心向背成之業種則見佛可  
期臨終喜躍隨念受生若不預修此福無常  
忽至周樟惶怖心路蒼茫淨業既空莫知投  
寄眼光失落依業受殃是故造罪造福雖復  
同營一種爲身不如修善修善見佛造惡獲  
殃也

故華嚴經偈云

寧受一切苦

得聞佛音聲

不受一切樂

而不聞佛名

所以無量劫

受此諸煩惱

流轉生死中

不聞佛名故

又無量壽經云佛告彌勒菩薩假使大千世界滿中猛火爲聞阿彌陀佛名故要當於中直過未足爲難

又觀佛三昧經云尔時彌勒菩薩白佛言世尊唯願世尊大慈大悲憐愍一切未來世中多有衆生造不善業佛不現在何所依怙得除罪咎佛告彌勒如來滅後多有衆生以不見佛作諸惡業如是人等當令觀像若觀像者與觀我身等無有異說是語時空中十方諸佛讚言善哉今正是時慎勿疑慮

佛告彌勒如來今者爲未來世五苦衆生犯禁比丘不善惡人五逆誹謗行十六種惡律



儀者爲如是等說除罪法、

尔時阿難白佛云何如來說除罪法佛告阿  
難如我在世皈依我者名皈依佛名皈依法  
名皈依僧觀佛像者先入佛塔以好香泥及  
諸淨土塗地令淨隨其力能燒香散華供養  
佛像說已過惡禮佛懺悔如是伏心經一七  
日復至衆中塗掃僧地除諸糞穢向僧懺悔  
禮衆僧足復經七日如是供養心不疲厭若  
出家人應誦毗尼極令通利若在家人孝養  
父母恭敬師長調心令軟心若不軟當強折  
伏令心調順自住靜處燒衆名香禮釋迦文  
佛而作是言南無大德我大和上應正遍知

大悲世尊願以慈聖覆護弟子作是語已五  
體投地泣淚像前從地而起齊整衣服結跏  
趺坐繫念一處隨前衆生繫心鼻端繫心額  
上繫心足指如是種種隨意繫念專置一處  
勿令馳散使心動搖心若動搖舉舌拄腭閉  
口開目叉手端坐一日至七日令身安隱身  
安隱已然後想像

若樂逆觀者從像足指次第仰觀初觀足指  
繫心專緣佛足五指經一七日閉目開目令其了  
了見金像指次觀足兩趺上令了了見次觀  
膊已次第至髭從髭觀面若不明瞭復更懺  
悔倍自苦策以戒淨故見佛像面如真金鏡

了了分明作是觀已觀眉間毫相如頗黎珠  
右旋宛轉此相見時見佛眉眼如天畫師之  
所畫作見是事已次觀頂光令分明了如是  
衆相名爲逆觀若樂順觀者從佛頂上諸妙  
螺紋猶如黑絲右旋宛轉次觀佛面觀佛面  
已具足觀身漸下至足如是往返凡十四遍  
諦觀一像極令了了觀一成已出定入定恒  
見立像在行者前見一了了復想二像已次  
想三像乃至想十皆令了了見十像已想一  
室內滿中佛像間無空缺滿一室已復更精  
進燒香散花掃塔塗地澡浴衆僧供養師僧  
父母等已發大誓願我今觀佛以此功德不

願人天聲聞緣覺正欲專求佛菩提道發是  
願已至求大乘當行懺悔勸請諸佛隨喜迴  
向正身端坐繫念在前觀佛境界令漸廣大  
一僧坊中滿中佛像方身丈六足下蓮華圓  
光一尋及通身光及衆化佛并佛侍者光明  
衆色皆令了了了一僧坊已復廣一頃百頃遠  
滿百由旬見一切像相好炳然此像成已想  
一閻浮提滿中佛像餘三天下亦皆遍滿身  
心歡喜倍加精進頂戴恭敬十二部經般若  
波羅蜜前五體投地誠心懺悔念想成已閉  
目叉手端坐正受更作遠想滿十方界見一  
切後身純金色舉身毛孔皆放光明一一光

明百億寶色一一色中無量雜色微妙境界  
悉自涌出此念想成名觀立像作是觀者除  
却六十億劫生死之罪亦名見佛於未來世  
值賢劫千佛爲其和尚於佛法中次第出家  
聞佛說法憶持不忘於星宿劫光明佛所現  
前受記麁心觀像尚得如是無量功德況復  
繫念觀佛眉間白毫相光尔時世尊復爲衆  
生說坐像法想像令坐寶華衆像坐時大地  
自然出大白光如瑠璃色白淨可愛衆白光  
間百億菩薩白如雪山想像毛孔出一一菩  
薩身毛孔中出金色光其光大盛照十方界  
皆作金色若有衆生觀像坐者除五百億劫

生死之罪未來值遇賢劫千佛於星宿劫中  
值遇諸佛數滿十万一佛所受持佛語身  
心安隱終不謬亂一一世尊現前受記過等  
數劫得成爲佛尔時世尊告阿難言若有衆  
生觀佛坐已當觀像行觀像行者見十方界  
滿中像行虛空及地見一一像從座而起一  
一像起時五百億寶華一一華中有無數光  
一一光中無數化佛隨心想現一一化佛放  
金色光照行者身是時行者入定之時自見  
己身三十六物惡露不淨不淨現時當疾除  
滅此不淨觀從貪愛生虛僞不實用此觀時  
爲使諸不淨變爲白玉自見己身如白玉瓶

內外俱空作是觀時宜服酥藥勿使身虛請  
諸行像以手摩頭放大光明照我已身是時  
行者自見己身如黃金色此想成已出定歡  
喜禮敬諸佛修諸功德迴向菩提爾時諸佛  
異口同音各各皆為行者說法雖未得道見  
佛聞法揔持不失此名凡夫念佛三昧得此  
三昧於剎那頃恒見諸佛所說大乘一日一  
夜即得通利一一諸佛皆說決言汝念佛故  
過星宿劫得成爲佛身相光明與我無異說  
是語已八十億佛一時放光光中無量化佛  
皆說是語佛告阿難此念佛三昧若成就者  
有五因緣何等爲五一持戒不犯二不起邪

見三不生憍慢四不恚不嫉五勇猛精進如  
救頭然行此五事正念諸佛令心不退當供  
養十方諸佛云何供養是人出定入塔見像  
誦持經時若禮一佛當作是念正遍知諸佛  
心智無礙我今禮一佛即禮一切佛若思惟  
一佛即見一切佛一一佛前有一行者接足  
爲禮皆是己身若以一華供養佛時當作是  
念諸佛法身功德無量不住不壞湛然常安  
我今以華奉獻諸佛願佛受之作是念已復  
當起想我所執華從草木生持此供養可見  
擬想即當作念想身諸毛孔令一毛孔出無  
數華雲無數香煙香雲遍於十方界施作佛



事還成金臺任行者前

若凡夫人欲供養者手擎香爐執華供養當發是願願此華香滿十方界供養一切佛化佛并菩薩無數聲聞衆受此香華雲以爲光明臺廣於無邊界無邊作佛事一一毛孔流出幢幡無量音樂名衣上服百種飲食諸雜供養並同前法佛告阿難未來衆生其有得是念佛三昧者當教是人密身口意莫起邪見莫生貢高若起邪命及貢高法當知此人是增上慢破滅佛法多使衆生起不善心乱和合僧顯異惑衆是惡魔伴如是惡人雖復念佛失甘露味此人生處以貢高故身恒卑小生

下賤家貧窮諸衰無量惡業以爲嚴飾如此  
種種衆多惡事當自防護今永不生頌曰

法身無像 至教無言 隨機應現 緣念流傳

愍茲沉溺 弘斯妙門 器識相感 實濟重昏

八功德水 七寶行樹 祥鳥遊池 清音流布

法鼓和鳴 休風引路 躬奉微言 仰規玄度

赫哉堯率 邈矣慈尊 光流天廟 威震黎元

仙華飄颺 寶殿雲屯 薦之福祚 功洽梵魂

彙征彼寄 願言非負 旣靜夢塵 還資真情有

書之傳之 天長地久 文而或虧 誓心何朽

諸經要集卷第一

序

派 疋分賣 流賣 反也 龍 領上音離 沃 日 篤上烏 靡 覲 莫上 緬下 徒反

的也反 驪 龍 有音珠也 缶 反 覃 徒南反

暨 及其器 反 創 楚壯反 慨 嘆也 反 公 流 順上音緣

澆 醜 離 古 堯 薄反也 音 彛 法也 訛 謬也 和 反 淪 滑

下息徐反 淪 眇 反美小 擦 操 反二 同 持也 刀 揆 反 衢 反

度也 慚 尼 六 反也 肉 炳 著 知上音丙 明也 下 鎔 金 音上

容 珂 雪 敗上音也 穴 字 炳 著 慮反 立也 搖 颺 向 下 余

滂 施 上音普 寶 色 苦 何 反 如 雪 響 亮 反 下 朗 力 向 尺 搖 颺 向 下 余

白 氍 下音 毛 布 也 牒 反 不 可 也 逮 及 音 代 楞 嚴 上 反 郎

反六 白 氍 毛 布 也 不 可 也 逮 及 音 代 楞 嚴 上 反 郎

羸反力垂  
號哭上音  
恬也音  
戶倚  
刺七  
亦  
隨葉詩下

葉反屏  
廁去上音  
餅下初使  
瓦礫曆下音  
蹈踐音  
盜道

徑反下古  
定隨嵐此下  
郎舍猛反  
咽喉煙二  
字音  
頗梨

柯反上  
普何反  
頗梨寶名也  
正柔粟軟下  
音丘墟

虛下  
耳璫下  
黎下音  
歌赫  
弈上許  
客反  
盛也  
下退  
字退

羯磨反  
上居  
莫賀反  
嶼谷字上  
溪砒也  
音亦  
明盛  
反下  
退字退

上詳里  
玄策反  
楚責  
金音  
父金匱反  
下求  
位挽

亦云  
頭脰此  
云百億  
數也  
掩蔽祭反  
必杜多  
口上  
徒挽

謂修  
行奔除  
衣食生  
處三  
慈朗反  
貪也  
所垢  
垢反  
上  
碑裂  
也反

怯弱下  
上音  
苦劫反  
玄奘唐  
下慈  
載名  
反鄙  
穢垢  
反上  
碑裂  
也反

相係下  
下音  
音苦  
劫反  
玄奘唐  
下慈  
載名  
反鄙  
穢垢  
反上  
碑裂  
也反

跌相  
係下  
下音  
音苦  
劫反  
玄奘唐  
下慈  
載名  
反鄙  
穢垢  
反上  
碑裂  
也反

面音也  
夫繼下  
足音  
膊翹反  
巨搖  
挂膠  
腸正  
上作  
蠶文  
字上  
螺中  
婉各  
轉反  
紆上也

阮美下的祚

反順如反下故

白規才反

均煒反

彌音獨也

邈瓊孤彙謂

眉角反

反

飄颺

羊上音又

余搖減上

向宅

反音

福

沉溺

反音

福

